

Minister Presidente a confirma: Repsol a pidi extension di 6 luna

Exploracion di subsuelo na Aruba a stop

ORANJESTAD (AAN) — Den conferencia di prensa di gobierno Dialuna mainta, Minister Presidente mr. Evelyn Wever-Croes, a toca e temanan basa riba preguntanan di prensa.

Di parti di Matutino DIARIO, e pregunta pa e dignatario tabata relaciona cu e trabaonan di exploracion di gas den e subsuelo (awanan teritorial di Aruba), door di e compania Repsol Aruba NV y su Consorcio Total.

Segun informacion cu a yega na nos mesa di redaccion e exploracion a para temporalmente, pasobra no tabata tin bon resultado den e prome fase di boramento, y Total a sali for di e proyecto y actualmente, nan ta buscando otro partner.

Prome Minister a ratifica e informacion aki.

E dignatario, den su update, a menciona cu manera ta conoci e prome boramento di prueba a tuma lugar entre Juni y Juli aña pasa, y den e prome pos cu nan a bay busca na e area di lama yama Bon Bini, no a haya nada. Nan a cere definitivamente, y nan no tin actividad eyan.

E ora ey a cuminza cu e di dos perforacion di prueba (proof boring) pero e momento ey, despues di e prome resultado e otro partner Total, cu tabata consorcio hunto cu Repsol a sali afo.

Momento cu esaki a sosode tur cos ta cay bao di Repsol so, y asina mes el a cuminza cu e di dos fase, cual a tuma



lugar pero nan a pidi un extension di seis luna pa nan haci analisis y yega na un conclusion.

Gobierno a duna nan e extension, y esaki ta finaliza na December proximo, pa e ora ey haya sa con a bay cu e di dos boramento y kico ta bay pasa cu e di tres boramento di prueba.

Repsol a indica cu awor cu

Total a sali, si nan no haya otro partner pa reemplace, e lo bira cada bez mas dificil.

Den sintesis, e di dos pre-boring a caba di finaliza, e analisis ta tumando lugar, y pa mas tarda na December di e aña aki gobierno lo haya informacion di nan, kico nan a topa cune, y si e ta viable of no economicamente.

Despues di esey ta bay wak con ta bay deal cu e fase 3. “Den esey nos ta, ainda ketobay den e fase di exploracion, no mas cu nan a pidi un extension di 6 luna”, Minister Presidente a duna di conoce.